

Na osnovu člana 4.2 i 4.7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 51. stav 8. Pravilnika o licencama – Prečišćeni tekst ("Službeni glasnik BiH", broj 63/16), postupajući po zahtjevu Društva sa ograničenom odgovornošću "ALUMINIJ Trade" Mostar, na sjednici Državne regulatorne komisije za električnu energiju, održanoj 27. marta 2019. godine, donijeta je

ODLUKA

O SUSPENZIJI PRIVREMENE LICENCE ZA OBAVLJANJE DJELATNOSTI MEĐUNARODNE TRGOVINE ELEKTRIČNOM ENERGIJOM

1. Društvu sa ograničenom odgovornošću "ALUMINIJ Trade" Mostar, suspendira se privremena licenca za obavljanje djelatnosti međunarodne trgovine električnom energijom, izdata Odlukom broj 05-28-12-131-18/18, počev od 1. aprila 2019. godine, a najkasnije do 31. marta 2020. godine.
2. Društvo sa ograničenom odgovornošću "ALUMINIJ Trade" Mostar može tražiti prestanak suspenzije iz tačke 1. ove odluke počev od 1. oktobra 2019. godine.
3. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

Društvu sa ograničenom odgovornošću "ALUMINIJ Trade" Mostar (u daljnjem tekstu: podnosilac zahtjeva) je Odlukom Državne regulatorne komisije za električnu energiju (DERK) broj 05-28-12-131-18/18 od 23. maja 2018. godine izdata privremena licenca za obavljanje djelatnosti međunarodne trgovine električnom energijom na period od 1. juna 2018. godine do 31. maja 2020. godine.

Podnosilac zahtjeva obratio se DERK-u podneskom broj 02-3-16/2019 od 13. marta 2019. godine, zaprimljenim istog dana pod brojem 05-28-12-137-1/19, kojim se traži suspenzija predmetne licence, počev od 1. aprila 2019. godine.

Sloboda je izbora vlasnika licence da u skladu sa svojim poslovnim interesima disponira pravom da određeno vrijeme prestane obavljati djelatnost međunarodne trgovine električnom energijom, ali je namjeru korištenja tog prava dužan prijaviti regulatoru, te o tome pribaviti regulatornim pravilima propisanu odluku.

Polazeći od nespornog prava podnosioca zahtjeva, kao vlasnika licence, da u smislu člana 51. Pravilnika o licencama – Prečišćeni tekst zatraži suspenziju iste, uz priloženi dokaz o prethodno izvršenoj uplati naknade za rješavanje zahtjeva za suspenziju, odlučeno je kao u dispozitivu ove odluke, te se licenca suspendira od 1. aprila 2019. godine, kako je to i traženo podnesenim zahtjevom. Međutim, pomenutim Pravilnikom je propisano da se suspenzija po zahtjevu vlasnika može izvršiti samo jednom u toku važenja licence i to na period od šest do dvanaest mjeseci. Imajući u vidu da podnosilac zahtjeva nije precizirao period na koji želi suspendirati izdatu mu licencu, to se ovom odlukom ostavlja mogućnost trajanja suspenzije do isteka krajnjeg roka propisanog Pravilnikom. Pored navedenog, pri donošenju odluke kao u dispozitivu, DERK se rukovodio i regulatornim pravilima propisanog minimalnog trajanja perioda suspenzije, te se podnosilac zahtjeva ograničava u pravu da suspendiranu licencu

ponovno aktivira do 1. oktobra 2019. godine. Imajući u vidu navedeno, to je na osnovu člana 51. stav 1. tačka a) Pravilnika o licencama – Prečišćeni tekst odlučeno kao u dispozitivu ove odluke.

Činjenica zahtijevanja suspenzije licence bit će uzeta u obzir kod ocjene tehničkih, ekonomskih i finansijskih kapaciteta vlasnika licence i drugih kriterija prilikom eventualne dodjele nove licence. DERK će pratiti pravni status suspendirane licence, te će, ukoliko podnosilac zahtjeva tokom trajanja perioda suspenzije ne iskaže svoju namjeru da djelatnost međunarodne trgovine električnom energijom nastavi obavljati, odlučivati o daljnjem pravnom statusu licence za period nakon isteka suspenzije, budući da podnosilac zahtjeva više ne raspolaže Dozvolom za snabdijevanjem električnom energijom – dozvolom II reda izdatom od strane Regulatorne komisije za energiju u Federaciji Bosne i Hercegovine.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema odluke.

Broj: 05-28-12-137-7/19

27. marta 2019. godine

Tuzla

Predsjedavajući Komisije

Milorad Tuševljak